

05/01/2003

Sasha tetap ligat di London

Zaharah Othman

KEPUTUSAN Sasha untuk melanjutkan pelajarannya di luar negara adalah semata-mata untuk menunaikan janji pada dirinya sendiri. Biarpun ini bermakna dia terpaksa meninggalkan dunia glamour yang didampinginya selama lapan tahun.

"Sasha memang sudah lama hendak meneruskan pelajaran tapi tidak pula sangka bahawa kumpulan Elite akan bertahan sebegitu lama," kata Sasha mengimbas kembali detik-detik dia membuat keputusan muktamadnya.

Sasha, penyanyi dan model terkenal di tanah air, kini menuntut di Universiti East Anglia, Norwich dalam bidang Sistem Maklumat Bisnes.

Bulan ini genap 26 tahun usia Sasha dan dalam usia yang muda ini lebih banyak yang telah dicapainya kalau berbanding dengan orang lain. Namun penyanyi tinggi lampai ini masih menyifatkan ia masih tidak mencukupi.

"Saya rasa saya tidak terlalu tua untuk mengejar ilmu dan saya senang sekali kembali belajar dan hidup sebagai pelajar," kata Sasha yang kini menghabiskan cuti Krismasnya di Amerika Syarikat.

Bagaimanapun, Sasha masih merindui anggota kumpulan yang bersama-sama membawa nama Elite ke persada seni, dia merindui peminatnya dan lebih-lebih lagi dia merindui ibu bapanya.

"Ada kalanya saya sedih dan menangis terutama sekali di pagi Hari Raya, walaupun datuk nenek saya ada di sini," sambung Sasha lagi.

Sasha mengaku bahawa dia menghargai hakikat bahawa dia boleh ke sana sini dengan bebas tanpa dikenali orang sebagai selebriti.

"Bagaimanapun, kalau Sasha pulang ke tanah air dan orang sudah lupa kepada Sasha, Sasha tentu akan sedih," katanya.

Ini mungkin tidak akan berlaku kerana walaupun Sasha tidak sering menjadi bahan rencana, Sasha sendiri banyak menulis mengenai kisahnya merantau di negara orang.

Sasha yang menulis untuk sebuah majalah, telah pergi ke Nigeria dan kini percutiannya di Amerika pasti sekali akan didokumentasikan sebagai sebahagian perjalanannya.

Untuk mengubat rindu, sesekali Sasha melangkah kembali ke pentas untuk menggayakan pakaian. Baru-baru ini, Sasha adalah antara beberapa orang model yang menggayakan koleksi Mohd Nazari Maarus dari Kraftangan Malaysia di London untuk tetamu khas Perdana Menteri Datuk Seri Dr Mahathir Mohamad.

"Dan pada majlis Kesatuan Malaysia di Norwich, Sasha pun diminta menyanyi. Bukan menyanyi sangat yang Sasha rindui, tetapi persembahan bersama kawan-kawan dan suasana semasa persembahan itu," katanya lagi.

Dan apakah ada teman mengubat kesunyian Sasha sekarang?

"Ya," jawabnya ringkas, "Dan buat masa ini itu saja yang perlu Sasha katakan."